



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Baucau
15 Jullu 2015

**Tribunál Distritál Baucau kondena pena prizaun tinan 13 ba arguidu kazu abuzu seksuál
ba menór**

Iha 09 Jullu 2015, Tribunál Distritál Baucau prezide leitura akordaun ba kazu abuzu seksuál ne'ebé involve arguidu JAL ho pena tinan 13 prizaun. Arguidu provadu komete krime abuzu seksuál hasoru lezada ne'ebé tinan 12 fulan 8, iha Distritu Viqueque.

Ministériu Públiku akuza arguidu kontra artigu 172 Kódigu Penál kona-ba violasaun konjuga ho artigu 173 Kódigu Penál kona-ba agravasaun. Maibé depoisde prosesu produsaun ba provas, tribunál halo alterasaun jurídiku ba artigu 177 Kódigu Penál kona-ba abuzu seksuál ba menór tanba lezada sei iha idade menoridade.

JSMP observa katak tribunál kontinua hatudu pasu signifikativu iha setór justisa tanba kontinua julga no kondena kazu ho natureza violénsia seksuál hasoru fetu. JSMP mós observa sentensa ne'ebé diak iha kazu balun relasiona ho krime kontra menór sira.

Mesmu desizaun ne'e bele konsidera adekuada tanba kondena liuhosi metade pena mínimu maibé aktu ne'ebé arguidu komete hasoru lezada liuhosi kesi metin lezada nia ibun, liman no ain nu'udar aktu ne'ebé kruél teb-tebes. JSMP hanoin katak tuir lolos tenke hetan konsiderasaun hanesan fatór agravantes.

Aleinde ne'e, tuir loloos Minitériu Públiku tenke konsidera atu akuza mós arguidu ho artigu 185 Kódigu Penál kona-ba violasaun ba domisiliu atu nune'e bele fo fatin ba tribunál hodi kondena arguidu ho pena todan liu.

“JSMP hanoin katak iha kazu sira involve violénsia seksuél hasoru fetu no labarik, aleinde kondena ho pena prizaun tribunál mós tenke konsidera atu kondena arguidu sira hodi selu indemnizaun ba vítima. Ida ne'e hanesan forma ida hodi rekoñese vítima nia sofrémentu no involve membru família seluk nu'udar responsabilidade sosial” dehan Diretór Ezekutivu JSMP, Luis de Oliveira Sampaio.

Abuzu seksuál hasoru labarik fo impaktu negativu no sériu teb-tebes ba labarik sira nia moris, afeitá sira nia dezemvolvimentu psikolójiku no saúde fiziku. Maioria kazu hanesan ne'e sei lori presaun no trauma durante sira nia vida tomak mesmu sira tama ona ba adultu ka forma ona família.

Dala-barak kazu hanesan ne'e mós bele rezulta opsaun ba vida ne'e la diak tanba trauma ne'ebé sira sofre hosi krime ne'e.

JSMP apresia vítima nia korajem hodi halo asaun kontra arguidu, maske sei ho idade menor. Lezada halo esforsu atu ses an hosi arguidu maske iha hela perigu nia laran no vítima tebe arguidu no halai kedas ba informa nia inan no kontinua keixa iha polísia.

JSMP enkoraza ba fetu sira hotu atu wainhira esperensia kazu hanesan ne'e, tenke ba kedas iha polísia ka ministériu públiku ka organizasaun sira ne'ebé fo atendimentu ba vítima atu salva no asegura provas relasiona ho kazu ne'e.

Tribunál prova katak arguidu ba dala rua iha lezada nia uma. Primeriu, arguidu haruka atu lezada tuir nia ba eskola maibé tanba lezada la ba, nune'e arguidu fila fali ba lezada nia uma. Iha segunda-ves ne'e laiha ema ida iha uma, tanba lezada nia inanaman ba hotu to'os. Tanba hare ema hotu laiha, arguidu fo osan US\$10.00 ba lezada maibé lezada lakohi. Maske nune'e, arguidu foti hena ida kesi lezada nia ibun, liman ho ain no kous lezada ba iha lezada nia maun nia kuartu laran no komete violasaun seksuál hasoru lezada. Depois akontesimentu, lezada istika nia an to'o hena ne'ebé arguidu uza hodi kesi nia namkore. Lezada tebe arguidu no halai ba fo hatene kedas nia inan no depois lori kazu ne'e ba iha polísia.

Bazeia ba relatóriu médiku katak lezada sofre nakles iha nia orgaun seksuál, tribunál kondena arguidu ho pena prizaun tinan 13 no selu kustu judisiál US\$30.00.

Kazu ne'e rejista iha tribunál ho Núc. 0336/12.PDBAU. Julgamentu leitura akordaun prezide hosi representante juis koleтиву Dr. Hugo da Cruz Pui, Ministériu Públiku representa hosi Dr. Domingos Barreto no arguidu hetan akompañamentu hosi Dr. Antonio Fernandes hosi Defensoria Publiku.

Atu hetan tan informasaun, favór ida kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org